



Encunter la veglia dal cussegl federal dumogna Heinz Brand sia moziun per in «masterplan per assicuranzas da malsauns pajablas» atras l'emprima chombra. KEYSTONE

Success imprevis per Heinz Brand

Il cussegl naziunal accepta sia moziun

■ **(anr/vi) Encunter la veglia dal cussegl federal dumogna il politicher grischun sia moziun per in «masterplan per assicuranzas da malsauns pajablas» atras l'emprima chombra. Il glindesdi ha il cussegl naziunal ditg gea cun 129 cunter 52 vuschs. Uss sto la chombra pitschna decider.** Nundumbraivlas intervenziuns datti per franar ils custs da sanadad. Las bleras n'han nagina schanza ed il parlament di mintgamai na, cunzunt sch'il cussegl federal s'exprima encunter. Tge è auter tar la moziun da *Heinz Brand* (pps/GR)? Per il solit proseguian ins la strategia «bottom-up», vul dir da sut ensi, di il cusseglier naziunal a l'anr. Ins dumondia suenter las raschuns per ils custs creschents ed emprovia da cumbatter quels. Sia proposta giaja en l'autra direzzion – «top-down» – e dumondia suenter las finamiras e co ch'ins cuntanschia quellas il pli tgunsch.

Dus exempels concrets

Ils custs da sanadad sa cumponian circa sco suonda: 95 pertschient prestaziun,

tschintg pertschient administraziun. Ils custs sajan bunamain in spivel da las prestaziuns da sanadad, explitgescha Brand. Cunzunt ils ambulatoris en spitals chatschian da preschent ad aut ils custs. Là custia ina consultaziun il dubel che tar il medi da chasa. Sche mintgin che giaja en in ambulatori stuess pajar ina tscherta summa, forsà 100 francs, sa reducissan quests custs, manegia Brand. El fa in exempel: Igl è dumengia ed ina dunna ha mal il venter. Ella va dabot en il spital per laschar intercurir. Sch'ella sto dentant pajar tschient francs, baiva ella probabel l'emprim in té e spetga fin ch'ella po ir il glindesdi tar il medi da chasa. Plinavant sa laschian cuntanscher «gudogns d'effizienz» cun eliminar prestaziuns nunnecessarias. Lezzas fetschian ora radund 20 pertschient dals custs da sanadad, di Brand. El fa era qua in exempel: In pazient consultescha dus medis ed omadus laschan far in MRI che portan exact ils medems resultats. Cun in dossier electronic da pazients pudess ins evitar talas dublettas.

Il masterplan

Concret pretenda la moziun «masterplan per ina assicuranza da malsauns pajabla» in rapport che calculescha cun differents scenaris il svilup da las premias e dals custs fin il 2030. In masterplan sto lura mussar cun tge mesiras concretas ch'ins po realisar ils gudogns d'effizienz senza che la qualidad pate-scha. Il cussegl federal duai plinavant proponer co rinforzar la concorrenza en il sectur da sanadad e co promover la responsabladad da mintga singul assicurà e mintga pazient.

Il minister da sanadad *Alain Berset* è sa dustà adumbatten cunter la moziun cun l'argument ch'ins haja gia deliberà la strategia «sanadad 2020». Lezza cuntegnia gia ina gronda part da las finamiras da la moziun. Plinavant saja pendentia in'entira retscha dad intervenziuns tar quest tema. Dad elavurar anc in ulteriur rapport na portia nagut.

Uss sto anc la chombra pitschna decider davart la moziun.